

# INUIT ATAQATIGIIT

## Inatsisartuni



14. februar 2019.

Inatsisartut Suleriaasianni § 37 imm. 1 naapertorlugu Naalakkersuisunut apeqquq imaattoq matumuuna saqqummiuppara.

### **Naalakkersuisunut apeqquqit:**

- 1. Qeqertarsuup Tunuani kiffartuussinissamik isumaqatigiissutit 2021-imiit atuuttussat nutarterneqassapput. Naalakkersuisut tamanna pillugu qanoq pilersaaruteqarnerlutik ilisimatitsissuteqarsinnaappat?**
- 2. Nunap immikkoortuini Qeqertarsuup Tunuani, Kitaani, Kujataanilu Disko Linep kiffartuussinissamut isumaqatigiissummik ingerlatsinera pillugu Naalakkersuisut qanoq nalilersorpaat?**
- 3. Angallannikkut kiffartuussinissamik isumaqatigiissusiornissamut Disko Line atorunnaarsinnissaanut imaluunniit allatut aqqissuussinissamut Naalakkersuisut pilersaaruteqarpat?**
- 4. Suna pissutigalugu S-61 innuttaasut angallanneqarnerannut atorunnaarsinneqarpa?**
- 5. Suna pissutigalugu Qeqertarsuup Tunuani ukioq kaajallallugu timmisartumik qulimiguulimmik angallassineq atorunnaarsinneqarnerneq Naalakkersuisut tunngavilersuisinnaappat?**
- 6. Nunatta sineriaani S-61 innuttaasut angalanerannut assartuutitut atuleqqissinnaanerannut Naalakkersuisut pilersaaruteqarpat?**
- 7. Nunatsinni avatangiisimut pinngortitamullu imaannaangissinnaasumut timmisartut qulimiguullit suut naleqqunnerunersut misissuiffigineqarsimanerluni?**
  - a) Nunatsinni avatangiisimut pinngortitamullu imaannaangissinnaasumut timmisartumik qulimiguulimmik nutaamik pisisoqassappat tamanna Nunatta karsianut aningaasanngorlugu qanoq naleqassava?**
- 8. Suna pissutigalugu Sarfaq Ittuk Kangaatsiamut Qasigiannguanullu tikissaarnerneq Naalakkersuisut tunngavilersuisinnaappat?**
- 9. Suna pissutigalugu Sarfaq Ittuk taamaallaat ukiakkut Qeqertarsuarmut tikittalernerneq Naalakkersuisut tunngavilersuisinnaappat?**
- 10. Sarfaq Ittuk Qeqertarsuup Tunuani illoqarfinnut tamanut ataavartumik aqqusaartalernissaanut Naalakkersuisut pilersaaruteqarpat?**
- 11. Umiarsuit sinersortaatit amerlinissaanut Naalakkersuisut pilersaaruteqarpat?**
- 12. Umiarsuit sinersortaatit amerlineqassappata Nunatta karsianut aningaasanngorlugu qanoq naleqassava?**
- 13. Qeqertarsuup Tunuani angallannikkut pissutsit pitsanngorsaaviginiarlugit Naalakkersuisut qanoq pilersaaruteqarpat?**

(Inatsisartunut ilaasortaq Aqqa Samuelson, Inuit Ataqatigiit)

**Tunngavilersuut**

Angallannikkut kiffartuussinissamik isumaqatigiissutit ukiup tulliaa naanerani atorunnaartussaassapput, 2021-miillu atuuttussat nutarterneqartussaallutik.

Ullutsinni Qeqertarsuup Tunuani angallannikkut pissutsit kipiluttunarluinnarput. Tamanna innuttaasut toqqissisimanngissutigaa.

Qeqertarsuup Tunuani angallannikkut pissutsit kipiluttunarneri illoqarfinni nunaqarfinnilu ineriartornissamut killilersuisuupput. Qeqertarsuup Tunuani angallannikkut pissutsit, akit qaffasippallaarneri angallatillu ullutsinnut naleqqutinnginneri pissutaaqataallutik innuttaasut angalalertorsinnaanngillat. Tamanna ajuusaarnarpoq, piffissamilu aggersumi allanngortinneqartariaqarluni. Qeqertarsuup Tunuani kiffartuussinissamik isumaqatigiissuteqarfiusumi inuussutissarsiorneq inerisarneqassappat angallannikkut pissutsit pitsanngorsarneqartariaqarput. Qeqertarsuup Tunuani angallanneq ineriartuutaasussamut saatsinneqartariaqarpoq.

Disko Line kiffartuussinissamik isumaqatigiissuteqarnera, taavalu innuttaasunik angallassinera pillugu nalilersueqqissaarnerit ingerlanneqartariaqarput. Ullutsinni Disko Linep silaannakkut immakkullu angallassineq tamakkiisumik naammassisinnaanngikkaa takusinnaareerparput. Qeqertarsuup Tunuani kiffartuussinissamik isumaqatigiissuteqarfiusumi angallannikkut pissutsit equngapput kipiluttunarlutillu. Taamaattumik innuttaasut silaannakkut immakkullu angalatillutik unnuinernut, nerisaqarnermut il.il. aningaasartuuteqarujussuaqqaarlutik angalasariaqartarput.

Qeqertarsuup Tunuani Sarfaq Ittuk tikissaavinnikuuvoq, ukiakkut Qeqertarsuarmut tikittalernikuunera eqqaassanngikkaanni. Innuttaasut assigiinngitsumik pitsaanagerusumik pitsaannginnerusumillu angallannikkut atugassaqartinneqarnerat akuersaarneqarsinnaanngitsoq isumaqarpunga. Taamaattumik Qeqertarsuup Tunuani innuttaasut Nunatsinnut akileraartartutut allatuulli toqqissisimanarnerusumik angalalertorsinnaanermut pisinnaatitaaffeqartariaqarput.

Timmisartut qulimiguullit taavalu umiarsuit angallatitut atorneqartut Nunatsinni avatangiisimut pinngortitamullu imaannaanngissinnaasumut naleqqutinngillat. Taamaattumik silaannakkut immakkullu angallatit eqqarsaatigalugit avatangiisimut pinngortitamullu naleqqunnerusunik peqalernissaanut Naalakkersuisut pilersaaruteqarnerisut paasisaqarfigerusuppara.

Ullut sulliviit qulit naliginnaasut iluanni apeqqutinnut akissutit tiginissaannut qilanaarpunga.